

আমাদের গ্রাম

বন্দে আলী মিরজা



আমাদের ছোটো গাঁয়ে ছোটো ছোটো ঘর

থাকি সেথা সবে মিলে নাহি কেহ পর ।

পাড়ার সকল ছেলে মোরা ভাই ভাই

একসাথে খেলি আর পাঠশালে যাই ।

হিংসা ও মারামারি কভু নাহি করি,

পিতামাতা গুরুজনে সদা মোরা ডরি ।

আমাদের ছোটো গ্রাম মায়ের সমান,

আলো দিয়ে বায়ু দিয়ে বাঁচাইছে প্রাণ ।

মাঠভরা ধান আর জলভরা দিঘি,

টাঁদের কিরণ লেগে করে ঝিকিমিকি ।

আমগাছ জামগাছ বাঁশঝাড় যেন,

মিলে মিশে আছে ওরা আত্মীয় হেন ।

সকালে সোনার রবি পূব দিকে ওঠে

পাখি ডাকে, বায়ু বয়, নানা ফুল ফোটে ।

আমাদের ছোট নদী

রবীন্দ্রনাথ ঠাকুর

আমাদের ছোট নদী চলে বাঁকে বাঁকে,
বৈশাখ মাসে তার হাঁটুজল থাকে ।
পার হয়ে যায় গরু, পার হয় গাড়ি,
দুই ধার উঁচু তার, ঢালু তার পাড়ি ।

চিকচিক করে বালি, কোথা নাই কাদা,
এক ধারে কাশবন ফুলে ফুলে সাদা ।
কিচিমিচি করে সেথা শালিকের ঝাঁক,
রাতে ওঠে থেকে থেকে শিয়ালের হাঁক ।

তীরে তীরে ছেলেমেয়ে নাহিবার কালে
গামছায় জল ভরি গায়ে তারা ঢালে ।
সকালে বিকালে কভু নাওয়া হলে পরে
আঁচলে ছাঁকিয়া তারা ছোট মাছ ধরে ।

আষাঢ়ে বাদল নামে, নদী ভরো ভরো,
মাতিয়া ছুটিয়া চলে ধারা খরতর ।
দুই কূলে বনে বনে পড়ে যায় সাড়া,
বরষার উৎসবে জেগে ওঠে পাড়া ।

আমি হব

কাজী নজরুল ইসলাম

আমি হব সকাল বেলার পাখি

সবার আগে কুসম-বাগে

উঠব আমি ডাকি !

সুখি মামা জাগার আগে

উঠব আমি জেগে,

হয়নি সকাল, ঘুমো এখন,

মা বলবেন রেগে।

বলব আমি - আলসে মেয়ে

ঘুমিয়ে তুমি থাক,

হয়নি সকাল, তাই বলে কি

সকাল হবে না ক ?

আমরা যদি না জাগি মা

কেমনে সকাল হবে ?

তোমার ছেলে উঠলে গো মা

রাত পোহাবে তবে।

ইচ্ছা

আহসান হাবীব

মনা রে মনা কোথায় ঘাস?

বিলের ধারে কাটব ঘাস ।

ঘাস কী হবে?

বেচব কাল,

চিকন সুতোর কিনব জাল ।

জাল কী হবে?

নদীর বাঁকে

মাছ ধরব বাঁকে বাঁকে ।

মাছ কী হবে?

বেচব হাটে,

কিনব শাড়ি পাটে পাটে ।

বোনকে দেব পাটের শাড়ি,

মাকে দেব রঙিন হাড়ি ।

ভোর হলো

কাজী নজরুল ইসলাম

ভোর হলো দোর খোল
খুকুমণি ওঠ রে,
ঐ ডাকে জুঁই-শাখে
ফুল-খুকি ছোট রে ।
খুলি হাল তুলি পাল
ঐ তরি চলল,
এইবার এইবার
খুকু চোখ খুলল ।
আলসে নয় সে
ওঠে রোজ সকালে,
রোজ তাই চাঁদা ভাই
টিপ দেয় কপালে ।

ছোটন ঘুমায়

সুফিয়া কামাল

গোল কোরো না গোল কোরো না
ছোটন ঘুমায় খাটে।

এই ঘুমকে কিনতে হলো
নওয়াব বাড়ির হাটে।

সোনা নয় রুপা নয়
দিলাম মোতির মালা

তাই তো ছোটন ঘুমিয়ে আছে
ঘর করে উজালা।

কানা বগীর ছা

খান মুহম্মদ মঈনুদ্দীন

ঐ দেখা যায় তাল গাছ

ঐ আমাদের গাঁ

ঐ খানেতে বাস করে

কানা বগীর ছা।

ও বগী তুই খাস কী?

পানতা ভাত চাস কি?

পানতা আমি খাই না

পুঁটি মাছ পাই না

একটা যদি পাই

অমনি ধরে গাপুসগুপুস খাই।

